



UCAPAN PELANCARAN

YANG BERHORMAT
DATO SERI SETIA Ir. AWANG HAJI SUHAIMI BIN HAJI GAFAR
MENTERI PEMBANGUNAN

SAMBUTAN HARI ALAM SEKITAR SEDUNIA 2021 **TEMA: 'ECOSYSTEM RESTORATION' / PEMULIHAN EKOSISTEM**

HARI SABTU
5 JUN 2021M BERSAMAAN DENGAN 23 SYAWAL 1442H

DEWAN BETABUR
KEMENTERIAN PEMBANGUNAN

بِسْمِ اللَّهِ الرَّحْمَنِ الرَّحِيمِ
الْحَمْدُ لِلَّهِ رَبِّ الْعَالَمِينَ
وَالصَّلَاةُ وَالسَّلَامُ عَلَى أَشْرَفِ الْأَئْبِيَاءِ وَالْمُرْسَلِينَ
سَيِّدُنَا مُحَمَّدٌ وَعَلَى الْهُوَصْبَرِيَّةِ أَجْمَعِينَ

- Yang Mulia
Dato Seri Paduka Ar. Awang Haji Marzuke Bin Haji Mohsin
Timbalan Menteri Pembangunan
- Yang Mulia
Dayang Martinah binti Haji Tamit
Pemangku Pengarah Alam Sekitar, Taman dan Rekreasi
Selaku Pengerusi Majlis
- *Excellencies Ambassadors and High Commissioners*
- Yang Berhormat Ahli-Ahli Majlis Mesyuarat Negara
- Yang Mulia Setiausaha-Setiausaha Tetap dan Timbalan-Timbalan Setiausaha Tetap
- Yang Mulia Ketua Pengarah Kerja Raya dan Pegawai-Pegawai Kanan
- Hadirin dan hadirat yang saya hormati sekalian



Salam Sejahtera dan Selamat Pagi

1. Alhamdulillah, kita bersyukur kerana dengan rahmat dan izin Allah jua kita semua diberikan kesempatan untuk berkumpul pada pagi ini bagi sama-sama meraikan sambutan Hari Alam Sekitar Sedunia 2021. Rasanya masih sempat lagi untuk saya mengucapkan Selamat Hari Raya Aidilfitri, Maaf Zahir & Batin, dan berdoa semoga semua amal ibadah yang kita laksanakan sepanjang bulan Ramadhan yang lalu diterima serta mendapat keampunan dari Allah subhanahu wata'ala jua, amin ya rabbal alamin.
2. Terlebih dahulu saya mengucapkan setinggi-tinggi terima kasih di atas penghormatan dan ingatan baik pihak Jabatan Alam Sekitar, Taman dan Rekreasi kerana menjemput saya hadir selaku Tetamu Kehormat bagi Majlis Sambutan Hari Alam Sekitar Sedunia 2021 dan seterusnya melancarkan jerayawara, kempen kebersihan senegara dan buku panduan penanaman pokok pada pagi ini. Tahniah dan syabas juga diucapkan kepada Jabatan Alam Sekitar, Taman dan Rekreasi diatas inisiatif ini yang pada hemat saya bertepatan dalam kita sama-sama menjadikan negara Brunei Darussalam sebagai sebuah negara yang berdaya tahan dan mempunyai alam sekitar yang terpelihara.
3. Hari Alam Sekitar Sedunia yang jatuh pada 5hb Jun setiap tahun, seperti lazimnya disambut secara global sejak ianya diperkenalkan oleh Persatuan Bangsa-Bangsa Bersatu pada tahun 1974. Ianya disambut dan dirai'kan diseluruh dunia untuk mengingatkan manusia tentang pentingnya alam semula jadi dan memberitahu kita bahawa alam tidak boleh dianggap remeh dan mesti dihormati kerana nilai-nilainya.

4. Dengan adanya sambutan Hari Alam Sekitar Sedunia ini telah menjadi wadah bagi penglibatan orang ramai untuk meningkatkan kesedaran serta membuat tindakan demi menjaga kesejahteraan alam sekitar sama ada secara individu maupun secara bersepada, baik di peringkat kebangsaan, serantau dan juga antarabangsa.
5. Tema pada tahun ini, 'Ecosystem Restoration' atau Pemulihan Ekosistem, dengan slogan: Reimagine. Recreate. Restore', merupakan kesinambungan acara Hari Bumi yang baru sahaja kita raikan pada 22hb April yang lalu yang bertemakan 'Restore Our Earth' atau 'Pulihkan Bumi Kitani'. Kedua-dua tema ini bertujuan bagi mengenalpasti keperluan untuk memulihkan bumi dengan memfokuskan kepada pengurangan dan adaptasi terhadap kerosakan dan pencemaran alam sekitar. Tahun ini juga bermulanya Dekad Pemulihan Ekosistem Persatuan Bangsa-Bangsa Bersatu ('United Nations Decade on Ecosystem Restoration') yang akan berlangsung sehingga tahun 2030, satu seruan kepada masyarakat global untuk melindungi dan menghidupkan semula ekosistem di seluruh dunia dengan menghentikan degradasi ekosistem dan memulakan serta meningkatkan kerja-kerja pemulihan sejagat.

Hadirin dan hadirat yang dihormati sekalian

6. Dengan wabak coronavirus dan orang-orang terkurung di dalam rumah, persekitaran dan induk bumi nampaknya sedikit bermanfaat. Sekiranya tidak ada aktiviti manusia di tengah-tengah lock-down yang disebabkan koronovarius, alam semakin mendapat masa untuk membersihkan dirinya dan merebut kembali ruangnya.

7. Marilah kita sama-sama berfikir sejenak dan kembali kepada realiti kehidupan dan persekitaran kita dan mengapa tindakan global bagi menangani isu kemerosotan ekosistem ini ditekankan. Kerosakan dan pencemaran alam sekitar yang kita lihat disekeliling kita adalah hasil dari aktiviti-aktiviti yang kita lakukan. Aktiviti-aktiviti yang tidak mampan atau tidak terkawal mengakibatkan kerosakan alam sekitar yang akhirnya menjurus kepada kemerosotan ekonomi.
8. Kehidupan manusia bergantung kepada ekosistem yang telah diciptakan oleh Allah Subahanwatala. Alhamdulillah, Negara kita masih dianugerahkan dengan kekayaan flora dan fauna dan ekosistem yang mampan. Biosfera yang stabil dan sihat akan mendorong masyarakat yang sihat. Oleh yang demikian, adalah menjadi tanggungjawab kita sebagai umat manusia untuk tidak alpa atau lalai dalam menjaganya dalam masa yang sama terus meningkatkan pertumbuhan dan perkembangan ekonomi serta pembangunan negara. Usaha ini memerlukan kerjasama setiap lapisan masyarakat untuk memainkan peranan masing-masing melalui pendekatan seluruh negara atau 'Whole of Nation Approach'.
9. Jadinya, bagaimana kita boleh mencapai keseimbangan di antara pembangunan, kehidupan manusia dan kesihatan serta kestabilan ekosistem ini? Antara kaedah-kaedah pemeliharaan dan pemulihan ekosistem termasuk secara proaktif seperti penggunaan kaedah penyelesaian berasaskan alam semula jadi atau 'nature-based solutions', penggunaan teknologi hijau, mempraktikkan amalan-amalan hijau, dan juga secara reaktif iaitu pemulihan ekosistem, sama ada yang di darat dan juga di perairan.

Hadirin dan hadirat yang dihormati sekalian

10. Saya difahamkan beberapa aktiviti telah disusun bagi meraikan sambutan Hari Alam Sekitar Sedunia pada tahun ini.
- Pertama, satu jerayawara yang berkonsepkan promosi kesedaran alam sekitar yang akan kita tinjau seketika nanti. Saya berasa gembira melihat pelbagai usaha, program dan perkhidmatan yang menjurus kepada perlindungan dan pemulihian alam sekitar dan ekosistem, dimana kita dapat lihat inisiatif dari agensi-agensi Kerajaan dan Badan-Badan Bukan Kerajaan (Non-Government Organisation, NGO), serta perkhidmatan dan produk mesra alam yang ditawarkan oleh sektor swasta dan pengusaha-pengusaha Mikro, Kecil dan Sederhana (MSME). Saya berharap ini akan menjadi wadah dalam memberikan inspirasi kepada orang ramai untuk beralih kepada amalan, tabiat dan alternatif hijau dan mampan.
 - Saya juga difahamkan pemenang-pemenang Pertandingan ‘Floating Waste Collector Conceptual Design’ akan turut diumumkan pada pagi ini. Diharapkan rekabentuk ini dapat dijadikan sebagai prototype dan seterusnya dinaiktarafkan dan ‘upscaled’ kepada teknologi yang efektif dan berkesan bagi pembersihan sungai-sungai dan longkang-longkang kitani. Alhamdulillah, kita akan dapat menyaksikan rekabentuk-rekabentuk yang terpilih sedikit masa lagi. Tahniah saya ucapkan kepada semua institusi yang menyertai pertandingan ini.

- Di samping itu, Buku Panduan Penanaman Pokok juga akan turut dilancarkan semasa acara ini. Dengan adanya buku panduan ini akan dapat dijadikan sebagai rujukan dan panduan bagi orang ramai untuk sama-sama mendokong usaha Kerajaan ke arah mencapai sasaran menanam 500,000 pokok baru menjelang tahun 2035, bagi mengurangkan pelepasan gas rumah hijau yang menyumbang kepada perubahan iklim. Saya percaya ini juga adalah salah satu usaha untuk memulihkan ekosistem kita, di mana dengan menanam pokok bukan sahaja bertindak sebagai penyerap karbon dan menghasilkan oksigen, ianya juga membersihkan udara kita, mengelak hakisan tanah serta mengindahkan persekitaran dan negara kita.
- Seterusnya, Kempen Kebersihan Senegara di bawah Jawatankuasa Induk Isu-Isu Kebersihan yang juga akan dilancarkan pada pagi ini. Saya difahamkan kempen ini adalah terbahagi kepada dua: kempen bagi kawasan darat yang akan diterajui oleh Kementerian Hal-Ehwal Dalam Negeri; dan kempen kebersihan di persisiran pantai bagi membersihkan serpihan laut atau ‘marine debris’ yang akan diterajui oleh Kementerian Pembangunan melalui Jabatan Alam Sekitar, Taman dan Rekreasi yang akan bermula pada 13 Jun ini. Saya berharap, dengan slogan: ‘It Takes a Nation to Make Brunei Environment Clean’, kempen ini akan menggalakkan dan menyeru setiap lapisan masyarakat untuk menanamkan rasa tanggungjawab dalam memainkan peranan masing-masing bagi memastikan persekitaran kita adalah bersih, sihat dan selamat.

Tahniah dan syabas diucapkan kepada JASTRe, termasuklah dari agensi-agensi Kerajaan, pihak swasta, badan-badan bukan kerajaan, pengusaha-pengusaha MSME dan juga sukarelawan-sukarelawan belia yang terlibat sama dalam menjayakan aktiviti-aktiviti yang telah diaturkan.

Dengan adanya pendedahan seperti ini akan meningkatkan lagi kesedaran alam sekitar di kalangan orang ramai dalam mewujudkan suasana persekitaran sejagat yang kondusif ke arah sebuah kehidupan negara yang berkualiti tinggi selaras dengan Wawasan Brunei 2035.

Akhirnya, saya tidak lupa juga mengucapkan tahniah kepada semua pemenang-pemenang yang telah berjaya didalam pertandingan yang telah dianjurkan oleh JASTRe sempena menyambut Hari Alam Sekitar Sedunia pada tahun ini.

Dengan lafaz Bismillahir Rahmanir Rahim Dan bertawakal kepada Allah Subhananahu Wata'ala Serta selawat dan salam ke atas junjungan besar kita Nabi Muhammad Shallallahu 'Alaihi Wassalam, kaum kerabat dan para sahabat serta pengikut-pengikut Baginda yang taat lagi jujur hingga akhir zaman, saya dengan sukacitanya merasmikan Pelancaran Sambutan Hari Alam Sekitar Sedunia 2021 pada hari ini, 23 Syawal 1442H bersamaan dengan 5 Jun 2021M.

Sekian

Wabillahi Taufik Walhidayah

Wassamalualaikum Warahmatullahi Wabarakatuh